

Xalbador Ikastegia elkarteak urteko biltzar nagusia egin zuen igandean

■ *Seaskako Kanboko kolegioa eraikitzeke mailegu guztiak ordaindu ditu taldeak*

L.Fourcade / Baiona

SEASKAKO kolegioa eraikitzeke asmoz duela hamar urte sortu zen Xalbador Ikastegia elkarteak urteko biltzar nagusia ospatu zuen igandean Kanbon eta aurrera segitzeko asmoa berretsi du, «kolegio edo lizeo berriaren eraikitzeke beharra agertzen bada Seaskan», azaldu zuen Miguel Torre, elkartearen diruzaina.

Bere garaian egoitza egokia izatea baitezpadakotzat jo zuen Seaskako zuzendari-tzak, Kanboko etxe bat erosteko aukera izan zelarik. Maileguak egin zituen etxea erosteko eta Herri Urrats bestarekin lortutako diruari esker batez ere, urtez urte etxea ordaindu zuten. Era berean, etxea egokitzeko eta eraikuntza berriak altxatzeko obrak abiatu zituzten. Gaur egun, 300 bat ikasle daude Kanboko kolegioan. Lizeoko ikasleek, berriz, Kanboko egoitza utzi zuten iaz Baionako Industria eta Merkataritza Ganbarako geletan sartzeko.

«Nahiz eta handitze obrak bukatu, inbertsio handiak egin beharko ditugu oraindik egokitze lanak egiteko», azpimarratu zuen Miguel Torrek. Izan ere, Kanboko kolegioa handitu da urtez urte baina ziurtasunezko obrak egitea baitezpadakoa izanen da etxe zaharrean. Ziurtasun batzordeak gutxienezko obrak eskatu dizkio elkarteari eta 450.000 liberako (11.250.000 pezeta inguru) inbertsioa eginen du aurten inposatutako normak errespetatzeko. «Lau urtez, 1.5 milioi libera jarriko beharko dugu etxe zaharra egokitzeko baina diru laguntza izanen dugu Kontseilu Nagusitik», azaldu zuen Torrek.

Alabaina, gauzak errazkiago iraganen direla gehitu zuen zeren duela hamar urte hartutako mailegu guztiak itzuli ditu elkarteak. Aurrekontuaren zati handia zen eta «hemendik goiti, erran dezakegu etxea osoki gurea dela, herriarena dela». Izan ere, mugaz bi aldeetako jende ugari parte hartu dute etxearen eraikitzearen obretan eta urteetako lanaren emaitzak azkenean agertu da. Elkartearen egoera berria kontuan hartzeko, bulego berria hautatu du biltzar nagusiak joan den igandean Kanbon. Izan ere, kehengo bulegoak hitzeman zuen geratuko zela zorra guztiak ordaindu arte duela hiru urte. Ondoren, hamar urteko borroken ondorekin, Gexan Alfaro elkartearen lehendakariak tokia utzi dio Mixel Etxeverri, «baina finkatutako ildo beretik jarraitzeko asmoa du elkarteak». X



Orhiko parajeetan galdu ziren Errenteriako hiru lagunak.

ARTXIBOKOA

Orhin galdutako mendizaleak onik atzeman zituzten atzo

Aizkorreta aita, semea eta iloba Nafarroan aurkitu zituzten

Orhiko mendien inguruetan, igande arratsaldeaz geroztik, desagertuta zeuden hiru mendizale gipuzkoarrak salbu eta onik atzeman zituzten atzo goizean, Nafarroako aldean. Atarratze (Zuberoa) eta Olorueko goi mendietako jandarmek igande iluntzeaz geroztik zeramatzen erreskate lanak baina azkenean Guardia Zibilako erreskate taldeak zituen aurkitu galdutako hiru mendizaleak.

Allande Sokarros / Maule

ERRETERIAKO (Gipuzkoa) Francisco Aizkorreta, Aritz Aizkorreta haren semea eta Elur Aizkorreta iloba, igande goizeko 9:00ak inguruan abiatu ziren Lezarteko auzoan (Larraine) alokairatuta zaukaten landa etxetik, Orhi puntara (2017 metro) igotzeko asmoz. Arratsaldean etxeratzea espero zuten eta, beraz, azaltzen ez zirela ikusita, euren senideek alerta eman zuten. Atarratzeko jandarmek zituzten hasi bilaketa

lanak eta errenteriarren autoa berehala atzeman zuten, Orhiko ipar ekialdeko gandorraren azpian kokatua den Erroimendiko garatetik kilometro bat beharago.

Olorueko goi mendietako jandarmen (PGHM) eta helikoptero baten laguntza izan zuten igande arratsetik Atarratzekoek, baina bilaketa lanak gelditu behar izan ziren ilunagatik. Atzo goizean goizik berriz hasi zituzten hogeitabat jandarmak eta erreskate operazioetarako agindulekua Larraine-ko udaletxean jarri zuten. Galdutako hiru mendizaleak Nafarroako alderat igaro zitekeela pentsatuta, jandarmek Guardia Zibila abisatu zuten eta, hain zuzen ere, honek zituen atzeman Uturzehe-tako leporat (Larraine-ko menderat) igotzen ari zirelarik.

Antza denez, hiru mendizaleak Orri gailurrera igo ziren Behaztoiko hegiaren gora eta handik Uturzehetako leporaino jaitsi. Ilunaren erruz edo, ez zuten autorat itzultzeko bidea atzeman eta Nafarroarat jaitsi ziren, artzain txabola batean pasatuz gaua. X

Sohutako Eperra ikastolarentzat dirua bildu nahi du AEDk Iparhaxe Astean

■ *Arrasaten Iparraldeari buruzko informazioa zabaltzea ere helburu dute*

Erredakzioa / Donostia

SOHUTAKO Eperra ikastolaren aldeko Iparhaxe Astea egingo dute aste honetan Arrasaten (Gipuzkoa), Arrasate Euskaldun Dezagun (AED) euskara elkarteak eta Zuberoako Hegoaxe taldeak elkarlanean, Jaurilaritzako Kultura sailaren, Arrasateko Udalaren eta Kutxaren laguntzarekin.

Aste honen helburu nagusia, Eperra ikastolarentzat dirua bildutea da, eta, honez gain, Iparraldeari buruzko informazioa zabaltzea. Horretarako, hainbat erakusketa jarriko dira gaurtik aurrera herriko zenbait lekutan: Monterronen, ikastetxeetan, tabernetan, Gaztetxean... Bestalde, Iparraldeari buruzko informazio zuzenagoa jaso nahi duenak,

abenduen 11an, ostegunez, Iparraldeari buruzko hitzaldia izango du AEDn.

Baina aste honen ardatza, Abadiaren Izarrak ikuskizuna izango da. Arrasateko Amaia Antzokian emango dute ostiralean, gaueko 22:30etan. Itxaro Bordak idatzitako testuan oinarritutako ikuskizuna da eta, orotara, 60 lagun inguruk hartzen dute parte. «Honelako emanaldiak ez dira ohikoak hemen, eta mugaz bestaldeko kultur produkzioaren zabal-kundea benetan aberasgarritzat jotzen dugu», azpimarratu du AEDk. «Eperrak zabaldu ditu haurrentzat bere ateak, baina oraindik hainbat lan eta material erosi beharra dauka. Beraz, interes kulturalaz gain, ikastolari laguntzeko ere badugunez, aben-

duaren 12an Amaia Antzokira joateko animatu gura genuke jendea». Ikuskizuna Iparraldean estreinatu zen, eta Arrasatekoaren ondoren, Iruñean izango da.

Zuberoan lehen mailako haurrentzat dagoen ikastola bakarra da Eperra, eta egoitza berria eraikitzeke, hainbat ekintza bultzatu ditu Hegoaxe, ikastolako gurasoak biltzen dituen taldeak.

Zuberotarrei laguntzeko, aurretik ere arrasatear askok egin du ekarpenik, ikastolaren alde merkaturatutako ezti poteak erosiz, laguntza bonoak eskuratuz, Eperrako auzolandegietan parte hartuz... eta guzti horrek bere emaitza eman zuen: irailean zabaldu zituen ateak Eperra ikastolak eta 60 haur inguruk bertan hasi zituzten eskolak. X

laburrean

■ Koldo Mitxelena Katedraren I. Biltzarra Gasteizen

KOLDO MITXELENA Katedraren I. Biltzarra egingo du Gasteizen gaur hasi eta osteguna bitartean, Koldo Mitxelena heriotzaren 10. urteurrenean. «Horren bitartez abiatzen da katedra, Mitxelena jaunak landu zituen bi alor-rak, hots, Euskal Filologia eta Linguistika Indoeuroparra, lantzen laguntzeko», dio antolatzaileek zabalduetako oharra. Katedraren aurkezpena eta biltzarren irekiera ofiziala gaur, 12:00etan, egingo da EHUK Gasteizen duen Filologia eta Geografia-Historia Fakultatean. X

■ Donostiako Musika eta Dantza Eskolako protesta

DONOSTIAKO Udalaren Musika eta Dantza Eskolako irakasle eta ez irakasleek protesta komunikatu kaleratu dute. «Ikasturtea hasi baino egun bat lehenago, eta azken urteetan gertatu ohi den bezala, Musika eta Dantza Eskolako irakasleek Easo kalean erabiltzen zituzten gelaz baliatzea galerazi zieten. Ondorioz, administratza eta ia eskola erdiak kale gorrian utzi gintuzten», diote. Eskaera zehatza egiten dute eskola honetako kideek: «Donostiar guztientzat hurbilerraz izango den eraikina behar dugu behin betiko, orain arte ukatu zaiguna eta legez dagokiguna». Hori lortu bitartean, toki egoki batean klaseak emateko aukera aldarrikatzen dute.. X

■ Gipuzkoako Diputazioak kalteak ordaindu beharko dizkio gidari bati

GIPUZKOAKO Foru Aldundiak 500.000 pezeta (20.000 libera) ordaindu beharko dizkio errepidean zegoen olio putzu batean irrist egin eta paretaren kontra joan zen autoaren gidariari. EAEko Auzitegi Nagusiak emandako ebazpenaren arabera, Foru Aldundia da «zerbitzu publikoen funtzionamendu okerraren erantzule». Sententzian esaten denez, Aldundiak ezin izan du zehaztu olio putzua nondik sortu zen. Istripua 1994ko martxoan gertatu zen N-1ean, Hondarribia parean. X

■ Hiesaren kontrako botika berria ikertzen ari dira

HIESAREN kontrako botika baten ikerketari berregiteko baimena eman dute Hego Afrikako agintariek. Virodene P058 farmakoaren ikerketa izan zuten bertan behera osasun agintariek, toxikoa izan zitekeen substantzia bat atzeman baitzuten. Orain, zailantzak alde batera utzi eta ikerketari ekin diote Pretoria-ko Medikuntza Fakultatean. X